

釋門真孝錄

雲棲優婆塞戒弟子張廣活輯

卷一 諸經略引上

大方便佛報恩經

如來以正遍知宣說真實之言。爲一切父母故，常修難行苦行，難捨能捨。頭目髓腦、國城妻子、象馬七寶、輦輿車乘、衣服飲食、臥具醫藥，一切給與。勤修精進、戒施、多聞、禪定、智慧，乃至具足一切萬行，不休不息，心無疲倦。爲孝養父母，知恩報恩故，今得速成阿耨多羅三藐三菩提。

菩薩於無量阿僧祇劫，孝養父母：衣服飲食、房舍臥具、乃至身肉骨髓，其事如是。以此因緣，自致成佛。

父母眾僧，宜應讚歎軟語，常念其恩。眾僧者，出三界之福田；父母者，三界內最勝福田。何以故？眾僧之中，有四雙八輩，十二賢士，供之得福，進可成道。父母者，十月懷抱，推乾去濕，乳哺長大，教誨技藝，隨時將養。及其出家，修得解脫，度生死海，自利兼利，一切眾生。佛告阿難：父母眾僧，是一切眾生二種福田。所謂人天泥洹解脫妙果，因之得成。

佛告阿難：均提沙彌，非適今也。過去世時，供養父母眾僧，修好功德，遇善知識，今得道果。

大乘妙法蓮華經

妙音菩薩至釋迦牟尼佛所，頭面禮足，奉上瓔珞，而白佛言：世尊，淨華宿王智佛問訊世尊，少病少惱，起居輕利，安樂行不？四大調和不？世事可忍不？眾生易度不？無多貪欲、瞋恚、愚癡、嫉妒、慳慢不？無不孝父母、不敬沙門、邪見、不善心、不攝五情不？